

REGLUR

um aðfaranám í háskólum.

I. KAFLI

Almennt.

1. gr.

Aðfaranám er ætlað þeim sem ekki hafa lokið reglubundnu námi í framhaldsskóla og hyggja á háskólanám eða þeim sem lokið hafa námi í framhaldsskóla og hyggja á háskólanám en þurfa að bæta við sig námi til að fullnægja inntökuskilyrðum háskóla. Aðfaranámið er skilgreint á framhaldsskólastigi og er skipulagt í framhaldsskólaeiningum. Námið er ekki metið til háskólaeininga.

Viðurkenndum háskóla er heimilt, að fengnu samþykki mennta- og menningarmálaráðuneytis, að bjóða upp á aðfaranám að skólanum. Í samþykki ráðuneytisins felst ekki að stjórnvöld séu skuldbundin til að veita fé til námsins.

Námið er á ábyrgð viðkomandi háskóla en honum er heimilt að fengnu samþykki ráðuneytis, að gera samning við framhaldsskóla eða aðra viðurkennda fræðsluaðila um framkvæmd þess. Samningar opinberra háskóla fara eftir ákvæðum laga um opinber fjármál nr. 123/2015.

II. KAFLI

Skipulag náms og framkvæmd.

2. gr.

Aðfaranám er ætlað fullorðnum nemendum og er ekki ígildi stúdentsprófs.

Aðfaranám getur verið skipulagt sem stök námskeið eða heildstætt undirbúningsnám.

Háskóli sem hyggst bjóða upp á aðfaranám skal gera greinargóða námslýsingu sem tekur til skipulags náms, kennslu og námsmats, umfangs og inntökuskilyrða í samræmi við aðgangsviðmið viðkomandi háskóla. Jafnframt skal þar fjallað um réttindi nemenda við námslok í aðfaranámi.

Háskóli ber ábyrgð á að meta fyrra nám, hæfni nemenda og gefur út prófskírteini er staðfestir námslok. Við mat á fyrra námi skal þess gætt að nemendur endurtaki ekki nám sem þeir hafa þegar lokið eða kunna að hafa tileinkað sér í starfi.

3. gr.

Ef aðfaranám er skipulagt sem heildstætt nám skulu nemendur í fullu námi geta lokið því á tveimur önnum til viðbótar fyrra námi. Ef aðgangsviðmið deilda kalla á meiri undirbúning er heimilt að skipuleggja aðfaranám sem þriggja anna nám til viðbótar fyrra námi.

III. KAFLI

Gildistaka.

4. gr.

Reglur þessar, sem settar með heimild í 4. mgr. 19. gr. laga um háskóla, nr. 63/2006, með áorðnum breytingum taka þegar gildi. Á sama tíma falla úr gildi reglur um aðfaranám nr. 1266/2013.

Mennta- og menningarmálaráðuneytinu, 29. október 2018.

Lilja D. Alfreðsdóttir

Ásta Magnúsdóttir